

30 OCT 2003

MAHATHIR-DASAR

DR MAHATHIR GARISKAN 10 TUMPUAN DASAR CAPAI PERTUMBUHAN SEIMBANG

KUALA LUMPUR, 30 Okt (Bernama) -- Perdana Menteri Datuk Seri Dr Mahathir Mohamad hari ini menggariskan 10 tumpuan dasar dalam usaha berterusan kerajaan mencapai pertumbuhan seimbang dan mapan bagi tempoh 2004-2005 bagi membina sebuah negara yang bersatu padu, adil, berdaya tahan dan berdaya saing.

Dr Mahathir, yang akan bersara esok setelah 22 tahun menerajui tampuk pemerintahan negara, berkata pertumbuhan ekonomi pada masa kini adalah membanggakan walaupun ia terjejas akibat keadaan ekonomi global yang bergolak dalam tempoh tiga tahun pertama Rancangan Malaysia Kelapan (RMK8).

Ketika membentangkan usul mengenai kajian separuh penggal RMK8 di Dewan Rakyat, Perdana Menteri berkata tumpuan dasar dalam kajian separuh penggal adalah untuk;

- \* memperkukuhkan asas ekonomi makro
- \* memperkuat ketahanan ekonomi bagi menghadapi sebarang kejutan
- \* meningkatkan keupayaan melawan persaingan
- \* menggiatkan semula pelaburan swasta dalam terutamanya untuk kembali menjadi jentera pertumbuhan
- \* menerokai sumber pertumbuhan baru
- \* mempercepatkan peralihan daripada teknologi rendah dan ekonomi berintensif tenaga kerja kepada ekonomi berteknologi tinggi dan berasaskan pengetahuan
- \* meningkatkan kualiti sumber manusia bagi memenuhi keperluan ekonomi yang diasaskan kepada nilai tambah yang lebih tinggi
- \* membangunkan masyarakat yang lebih adil dengan agihan kekayaan dan pembangunan sama rata
- \* menanam nilai-nilai hidup yang sesuai dengan pencapaian tinggi semua kaum, dan
- \* meningkatkan kerjasama antarabangsa bagi kesejahteraan.

Dr Mahathir, yang membentangkan ucapan dasar sebagai Perdana Menteri bagi kali terakhir di Parlimen, menegaskan teras dasar Rangka Rancangan Jangka Panjang Ketiga dan RMK8 akan diteruskan untuk menghadapi cabaran-cabaran itu.

Di samping itu, Perdana Menteri berkata, kajian separuh penggal menyokong pakej strategi baru yang diperkenalkan pada bulan Mei 2003 untuk menangani masalah dalaman dan luaran yang dihadapi.

Menurutnya, Malaysia menghadapi cabaran luar biasa dalam tempoh tiga tahun pertama RMK8 disebabkan oleh keadaan yang tidak dijangkakan iaitu bermula dengan kelembapan ekonomi dunia akibat kemerosotan ekonomi Amerika Syarikat dan kemerosotan permintaan keluaran elektronik dunia.

Ini diburukkan oleh peristiwa 11 Sept, 2001 di Amerika Syarikat dan disusuli dengan pencerobohan ke atas Iraq dan penyakit Sindrom Pernafasan Akut Yang Teruk (SARS).

Bagaimanapun, Dr Mahathir berkata, ekonomi Malaysia masih dapat dipulihkan dengan pertumbuhan bagi tahun ini dianggarkan sebanyak 4.5 peratus.

Dalam tempoh kajian semula (2001-2003), diramalkan bahawa pertumbuhan Keluaran Dalam Negeri Kasar (KDNK) adalah 3.0 peratus walaupun faktor luar dan sumbangan eksport barangan elektrik dan elektronik sebanyak 70 peratus adalah terlalu tinggi.

"Kita harus berbangga kerana pendapatan per kapita telah meningkat sebanyak 2.4 peratus setahun daripada RM12,843 pada tahun 2001 kepada

RM14,324 pada tahun 2003."

"Jika berdasarkan kuasa beli pariti, peningkatan dalam pendapatan per kapita adalah lebih mengagumkan kerana tumbuh pada kadar purata sebanyak 3.9 peratus setahun kepada AS\$9,380 dalam tahun 2003," kata beliau.

Dr Mahathir berkata, pertumbuhan telah dicapai dalam suasana harga yang stabil dan tahap pengangguran yang rendah manakala perdagangan luar negara turut kukuh seperti yang dicerminkan oleh lebihan eksport daripada import tiap tahun.

Dalam pada itu, katanya, defisit fiskal masih kekal pada tahap yang tidak membebankan meskipun terdapat peningkatan perbelanjaan awam berikutan dengan usaha kerajaan untuk merangsang pertumbuhan ekonomi.

Perdana Menteri berkata kerajaan juga berjaya mengurangkan kadar kemiskinan, dengan menyediakan perumahan dan kemudahan asas yang lebih baik, terutama kepada mereka yang berpendapatan rendah tanpa menjejaskan kualiti hidup rakyat.

"Walaupun kita menjangkakan persekitaran ekonomi dunia akan bertambah baik dalam tempoh akhir RMK8, kita harus bersedia untuk menghadapi cabaran baru yang akan menguji daya tahan, produktiviti, kecekapan dan kemampuan inovatif kita," katanya, sambil menambah bahawa persekitaran luaran, ekonomi dan politik akan terus menjadi perhatian utama.

Perdana Menteri berkata, globalisasi mampu meningkatkan dagangan tetapi interpretasi globalisasi yang diterima sekarang lebih menguntungkan negara maju kerana tekanannya ialah kepada kebebasan dagangan dan bukan dagangan yang saksama.

Oleh itu, katanya keutamaan kepada persaingan sudah tentu menguntungkan negara maju dan syarikat gergasi mereka.

"Kita akan cuba menukar agenda Globalisasi melalui WTO (Pertubuhan Dagangan Dunia). Tetapi sementara itu kita perlu bersiap sedia untuk bersaing dalam keadaan tidak seimbang," tegas beliau.

Dr Mahathir juga berkata, bahawa negara juga akan menyaksikan persaingan yang lebih sengit dari negara baru di pasaran dunia, termasuk China dan India yang muncul dengan pantas sebagai pusat tarikan pelaburan dan pengeluar keluaran dan perkhidmatan berteknologi.

Dr Mahathir yang juga Menteri Kewangan berkata, kerajaan akan menguruskan ekonomi makro secara berhemat bagi memastikan asas ekonomi makro seperti inflasi yang rendah, tabungan yang mencukupi, kedudukan imbalan pembayaran yang sihat, kadar pertukaran yang stabil dan kedudukan fiskal yang berhemat terus diperkukuhkan.

Usaha juga akan dibuat untuk memperluaskan asas ekonomi, membangunkan sektor kewangan dan pasaran modal yang lebih cekap serta memperbaiki risiko pengurusan dan pentadbiran korporat, katanya.

Menurutnya, prospek ekonomi makro dijangka lebih baik untuk dua tahun akan datang dengan KDNK sebenar dijangka tumbuh pada kadar purata 6.0 peratus setahun selaras dengan keluaran potensi ekonomi dalam jangka panjang.

"Kadar pertumbuhan ini akan mengembalikan kita ke landasan asal untuk mencapai sasaran pembangunan dalam Dasar Wawasan Negara dan Wawasan 2020.

"Berdasarkan kadar pertumbuhan ini, Keluaran Negara Kasar per kapita akan meningkat pada purata 4.4 peratus kepada RM15,600 dan kuasa beli pariti meningkat dengan lebih tinggi sebanyak 5.5 peratus serta mencapai AS\$10,400 dolar pada tahun 2005," kata beliau.

Perdana Menteri berkata, pertumbuhan dijangka disokong oleh permintaan dalam negeri dan pertumbuhan ekonomi dunia yang berterusan dan permintaan swasta akan menjadi peneraju kepada ekonomi Malaysia selaras dengan dasar yang menggalakkan sektor swasta untuk menerajui pertumbuhan ekonomi.

"Kita menjangkakan pelaburan swasta akan pulih dan tumbuh 12 peratus setahun berikutan permintaan dalam dan luar negeri yang semakin baik.

Perusahaan Kecil dan Sederhana (PKS) akan dijadikan pemangkin untuk menggiatkan pelaburan dalam negeri.

"Kita mahu melihat PKS memainkan peranan yang penting dalam ekonomi seperti di negara Jepun, Korea Selatan dan Taiwan. Untuk memajukan PKS di Malaysia, usaha bersepadu akan dibuat untuk meninggikan kemahiran teknologi, menggalakkan penggunaan ICT secara meluas serta meningkatkan kemampuan mencipta dan membangunkan produk baru berjenama sendiri," katanya.

Dr Mahathir berkata, usaha juga akan terus diambil untuk mempertingkatkan pencapaian PKS terhadap kemudahan pembiayaan, termasuk menyediakan kemudahan pembiayaan yang dibentuk sesuai dengan keperluan khusus mereka.

Sementara pelaburan asing langsung terus digalakkan, perhatian yang lebih juga akan diberikan kepada pelaburan tempatan.

Perdana Menteri berkata, penggunaan swasta dijangka tumbuh pada kadar tujuh peratus disebabkan keyakinan pengguna yang berterusan dan pendapatan boleh guna yang meningkat.

Dasar fiskal dan kewangan yang lebih baik, peluang pekerjaan yang cerah, pemulihan dalam permintaan luar negeri, harga komoditi yang lebih baik dan kesan positif keuntungan pasaran saham yang cergas akan menggalakkan penggunaan oleh swasta.

"Dasar kita untuk mengekalkan kadar faedah dan inflasi yang rendah akan meningkatkan permintaan terhadap barangan tahan lama," kata beliau.

Bagaimanapun, Dr Mahathir berkata kerajaan akan mengurangkan pelaburan awam kepada tahap yang lebih sihat dalam tempoh dua tahun akan datang berikutan dengan jangkaan pemulihan pelaburan sektor swasta dan pertumbuhan penggunaan awam yang lebih baik.

Beliau berkata dengan prospek perdagangan dunia yang semakin baik, eksport Malaysia dijangka meningkat dan berkembang sebanyak 7.4 peratus setahun dan lebihan akaun dagangan akan dapat dikekalkan dalam tempoh kajian semula.

Defisit akaun perkhidmatan pula, kata Perdana Menteri, akan berkurangan kerana aliran masuk yang tinggi melalui sektor pelancongan, pendidikan, pengangkutan, kewangan, kesihatan dan perkhidmatan profesional.

Bagi tempoh akhir RMK8, lebihan akaun semasa dijangka terus dapat dikekalkan pada tahap 10 peratus daripada KDNK pada tahun 2005.

Beliau berkata, sektor pembuatan dan perkhidmatan akan terus menjadi penyumbang utama kepada pertumbuhan dengan sektor pembuatan dijangka kembali kepada paras pertumbuhan yang tinggi iaitu 7.8 peratus setahun berikutan permintaan yang kembali sihat dalam sektor kecil elektronik dan elektrik serta kelengkapan pengangkutan.

Sektor perkhidmatan pula dijangka berkembang sebanyak 6.0 peratus setahun, disumbang terutama oleh sektor kecil kewangan, insurans, harta tanah dan perkhidmatan perniagaan; perdagangan borong dan runcit, pelancongan, hotel dan restoran, pengangkutan, penyimpanan dan komunikasi.

Perdana Menteri mengumumkan bahawa kerajaan akan mengambil inisiatif secara lebih tersusun untuk mewujudkan suasana mesra perniagaan yang dapat menjaga kekayaan.

"Kita akan terus berusaha untuk mengurangkan kos menjalankan perniagaan, mengkaji semula struktur insentif, memperbaiki perolehan pasaran dan memastikan bekalan sumber manusia yang sejajar dengan perubahan teknologi dan permintaan pasaran."

Dr Mahathir berkata, sektor pembuatan akan terus menghadapi cabaran persaingan daripada ekonomi baru muncul tetapi akan memainkan peranan penting kepada pertumbuhan ekonomi.

Pada tahun 2003, sektor berkenaan telah menyumbangkan 30.6 peratus kepada KDNK, 83.0 peratus kepada jumlah eksport dan 27.8 peratus kepada

jumlah pekerjaan.

Katanya, kerajaan telah mengambil pelbagai langkah bagi meminimumkan kesan buruk daripada keadaan luaran dengan mengadakan pakej rangsangan yang telah diperkenalkan dalam tempoh kajian semula dan menyediakan insentif cukai serta meningkatkan pembangunan sumber manusia.

Dana untuk latihan dan latihan semula juga telah diadakan bagi meninggikan produktiviti dan kecekapan tenaga kerja.

Oleh itu, kata Dr Mahathir, adalah penting sektor pembuatan mempercepatkan proses peralihan kepada industri berteknologi tinggi dan berasaskan pengetahuan.

Menurutnya, kerajaan akan memberi tumpuan kepada usaha mengurangkan kerenaah pentadbiran, mengkaji semula proses kerja dan mempermudah prosedur serta menyediakan insentif dan infrastruktur sokongan demi mewujudkan persekitaran perniagaan yang mesra kepada pelabur.

Untuk membolehkan keluaran industri termasuk PKS, kerajaan akan menggalak dan membantu penubuhan syarikat perdagangan ala "sogo syosha" Jepun supaya menjadi saluran bagi memasarkan produk Malaysia di luar negara.

Bagaimanapun, Dr Mahathir berkata syarikat tempatan hendaklah sanggup membayar komisen yang berpatutan untuk khidmat berkenaan sementara syarikat "sogo shosha" pula memberi layanan yang sebaiknya kepada pasaran dan pelanggan luar.

Bagi meningkatkan keupayaan dan kemampuan PKS, pelbagai program akan diteruskan supaya pembekal boleh diharap akan mendapat kepercayaan syarikat utama yang beroperasi di seluruh dunia.

Sejajar dengan Rancangan Pembangunan Industri Kecil dan Sederhana, PKS akan terus dibekalkan dengan pengetahuan kewangan, pengurusan dan kepakaran teknikal, kata beliau. -- BERNAMA

MKO AHM